

佛说过去世佛分卫经 1 卷

No. 180

佛说过去世佛分卫经

西晋月氏国三藏竺法护译

佛言：「过世有佛入城分卫，与尊弟子诸菩萨俱；弟子菩萨姿容相好，皆悉端正，如本所行各得其道。

「有一母人，妊身数月，见佛及僧有所至奏，心自计愿：『我所怀子生，如此使为沙门佛弟子。』日月满足即生安隐，儿亦姝好与众人异，母以恩爱无意令儿行作沙门，中有觉意，即自念言：『我前有愿，若我生子当使为道，儿今已生，有异凡人，令我安隐，复无恶露，不可恋嫪恩爱之故，违我本心。』

「子年七岁，家复贫狭，即作二人饭具，及三法衣，手持澡瓶，自将其子行诣佛所，稽首佛足，前白佛言：『愿哀我子使为沙门，令后得道，身形如佛。』佛即听之，令作沙门。母以澡灌，前洗儿手，应时九龙从瓶口出，吐水灌儿手中，澡讫残水散儿头上，水之潺湲于儿头上，化成华盖珠交络帐。中有师子座，上有坐佛。佛笑，口中五色光出，照十亿佛刹，还遶佛身从儿顶入。母以饭具前上佛，并食其子，便发无上平等道意，应时十亿佛刹为六反震动，众刹诸佛皆自然现。佛以母饭饱，尔所佛及诸比丘僧皆等饱足，其饭如故，亦不损减；母即欢喜，及无数天人皆得阿惟越致。

「时，儿发堕成为沙门，即亦得立不退转地。母前白佛：『今我所见，有三可怪：我澡儿手九龙吐水，此一可怪；澡已残水散儿头上，化成宝帐，及师子座上有坐佛，是二可怪；佛笑口中光从儿顶入，是三可怪；愿佛为我分别说之。』佛言：『此儿却后十四劫当得作佛，九龙当浴，师子座华盖宝帐，

佛笑光从儿顶入，皆是其应。』母闻佛言倍怀踊跃，后当作母人转轮圣王，积七百世竟，其劫寿尽转母人身，当得阿惟越致。」

佛言：「是时小儿，我身是；我今于世功德如是。」诸天龙神、一切人民，闻佛所说，皆得阿惟越致。

无热佛 性空佛 天王佛 金仁佛

## 佛说过去世佛分卫经

---

【经文信息】大正藏第 03 册 No. 0180 过去世佛分卫经

【版本记录】CBETA 电子佛典 Rev. 1.8 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，Jasmine 提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】

---